

RADUNANZA CUMÜNALA DALS 1. DECEMBER 2000

Tractandas:	1. Protocol da la radunanza cumünala dals 27-10-00
	2. Tscherna dals scrutinaduors
	3. Discussiun in regard il proget d'ingrondimaint dal Parc naziunal svizzer e decisiun consultativa
	4. Comunicaziuns e varia

Preschaints: 372 votantas e votants

1. Protocol:

Il protocol vain approvà.

2. Tscherna dals scrutinaduors e dombravuschs

Sco scrutinaduors vegnan elets Mario Rodigari, Fadri Besio, sco dombravuschs: Irma Tognini, Agnes Zala, Duri Roner, Guolf Denoth.

3. Discussiun in regard il proget d'ingrondimaint dal Parc naziunal svizzer e decisiun consultativa

A l'ura fixada beneventescha il president cumünal ils numerus preschaints spordschond ün salüd special a dr. Nuot Saratz, chi sta a disposiziun per dar sclerimaints giuridics areg. il contrat e las agiuntas da tal. El manzuna las lungas trattativas chi sun precedüdas per pudair preschantar hoz il proget per s-chaffir üna zona circundanta sün territori cumünal. In bliers inscunters tanter la cumischiun federala dal Parc e la cumischiun accumpagnanta dal proget es il prüm concept gnü adattà e modificchà als giavüschs dals rapreschantants da la regiun e dals cumüns pertocs. A la populaziun es gnüda sporta la pussibilità da s'approfondir illa documainta chi's referischa al proget per ch'ella possa trar üna decisiun cun respunsabilità ed a favur da l'avegnir da nos cumün. Areg. ils böts dal proget d'ingrondimaint rinvia el a las externaziuns fattas in radunanza d'orientaziun. Davo fat resortir la portada dal proget per nos cumün e declerà il proceder driva il president la discussiun.

Illa discussiun vegnan fat resortir specialmaing ils seguaints argumaints:

Il rapreschantant dals adversaris critichescha il film preschantà illa radunanza d'orientaziun sco tendenzius. Nus nun eschan pronts da dar sü noss'autonomia e libertà e da'ns laschar metter suot avuadia da las autoritats federalas, chantunals e dals scienzats; ledschas e prescripziuns daja fingià avuonda. Tenor lur parair es il Parc grond avuonda, que chi's po gnir megliorà es amo la qualità. Seguond *il directer da las OEE* esa da dar atenziun da na reagir massa tard. L'ingrondimaint nu disturba las OEE, el es cumpatibel ed avert a novas strategias dal marchà da la forz'electric. *Ün oter votant* metta pais sül fat cha'l Parc naziunal es stat adüna ün bun partenari fidaivel chi ha portà bliers avantags al cumün. El propuona da limitar il contrat da dürada sün 10 ons, que chi permettes da pudair decider a temp ütil definitivmaing in basa ad experienzias fattas. Da vart da *la giuventüna* as temma las restricziuns massa grondas areg. occurrenzias sportivas, tscherchar cornas etc., intant ch'üna votanta as dosta cunter disqualificaziuns dals scienzats ch'ella vezza sco perits independents. Cun ün minimum da restricziuns ragiundschain nus ün

grond nüz tant per la natüra, per l'economia cumünala sco eir per las generaziuns venturas, uschè argumentescha ün *ulterius preschaint* seis sustegn invers il proget.

A la dumonda sur da che chi saja vairamaing da vuschar explicha il iurist N. Saratz chi's tratta dad üna votumaziun consultativa. La decisiun definitiva vain actuala cur chi sarà qua la basa legala da la Confederaziun. *Ün votant* citescha divers artichels dal contrat fond resortir cha quels sajan concepits tuottafat a favur dal Parc, que chi giaja cunter a la politica da consonanza tanter il cumün ed il parc, sco ch'ell' es gnüda applichada fin hoz. Il iurist contestescha quetant muossand via sül dret dal cumün da desdir il contrat. *Il mastral* repassa l'istorgia dal Parc algordand a la decisiun dal cumün dal 1914 da surdar 114km² a la Confederaziun e que in ün temp inua cha'l god d'eira quasi l'unic'entrada; el as s-chüsa d'avair drovà illa radunanza d'orientaziun il pled „bornà“ invers ils adversaris e e pleda a favur da la cuntraproposta per ün temp da contrat da 10 ons a prouva. Il delegà cumünal aint illa *società da trafic* refüsa tuots rimprovers da manipulaziun fats invers quella aint il artichel „La tuorta es fatta“. La società vezza las restricziuns in relaziun cullas schanzas economicas sco acceptablas. Il proget ecologic es important per l'economia e'l turissem da nos cumün e maina üna propaganda positiva dafatta gratuita.

Illa prüma votaziun per scrutin vain sbüttada la racumandaziun da la cumischiun federala e da la suprastanza d'ün contrat cün dürada da 30 ons, la cuntraproposta per üna dürada dal contrat da 10 ons vain acceptada , 100 cedlas vödas e 37 invalidas. Illa votaziun principala refüsa la radunanza la dumonda consultativa per ün ingrondimaint dal Parc naziunal sün territori cumünal cun 227 na cunter 145 schi e cun que da nu vulair proseguir cun las trattativas.

4. Comunicaziuns e varia

Il president cumünal dà cuntschaint cha la radunanza da preventiv gnarà bannida pels 15 december e varà sco ulteriuras tractandas la partecipaziun finanziaria a la TOP e la planisaziun da la zona d'exploaziun da crappa giò Crastatscha

Ün votant es dischillus da noss rapreschantants politics i'l Grond Cussagl chi nu s'han intermiss cunter la decisiun da cumpilar tuot las publicaziuns ufficialas in rumantsch grischun

Il president da la cumischiun dal center da sport ingrazcha al mastral per seis ingaschamaint a favur da la donaziun da frs. 65'000.—da la fundaziun dna. G. Bazzi per drizzar urdegns da sport per nossa giuventüna. El avisa cha la cumischiun gnarà scholta al mumaint cha'ls intops areg. il provedimaint d'ova in connex cul glatsch saran evas.

Ün oter preschaint deplorescha ils camiuns cun öli chi vegnan di per di giò d'Engiadina e passan nos cumün. La suprastanza piglia incunter l'intimaziun da vaira schi nu füss pussibel da transportar l'öli cul tren fin a Scuol.

In buna fai
il president:



l'actuar:



